



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM

Nr. 850, Datë 03.12.2021

“MBI AUTORIZIMIN E PËRQENDRIMIT TË REALIZUAR NËPËRMJET PËRFTIMIT TË KONTROLLIT TË BANKËS SË BASHKUAR TË SHQIPËRISË NGA SHOQËRIA EUROSIG SHA.”

Komisioni i Konkurrencës me pjesëmarrjen e:

Znj. Juliana LATIFI	Kryetar
Znj. Leida MATJA	Zv/Kryetar
Znj. Rezana KONOMI	Anëtar
Znj. Adriana BERBERI	Anëtar
Z. Denar BIBA	Anëtar

Në mbledhjen e tij të datës 03.12.2021, shqyrtoi çështjen me:

Objekti: Autorizimi i përqendrimit të realizuar nëpërmjet përfimit të kontrollit të Bankës së Bashkuar të Shqipërisë nga shoqëria Eurosig SHA.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”, i ndryshuar; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve, mbi njoftimin e përqendrimit të realizuar nëpërmjet përfimit të kontrollit të Bankës së Bashkuar të Shqipërisë nga shoqëria Eurosig SHA.

VËREN SE :

Transaksioni dhe procedura

Pranë Autoritetit të Konkurrencës, është depozituar njoftimi mbi përfimin e kontrollit të Bankës së Bashkuar të Shqipërisë nga shoqëria Eurosig SHA.

Referuar “Kontratë për shitblerjen e aksioneve” të lidhur më datë 08 korrik 2021, palët janë:

Pala blerëse: Eurosig SHA është një shoqëri aksionare, e themeluar sipas legjislacionit shqiptar, me objekt aktiviteti: “sigurimet në dëme”, në përputhje me parashikimet e ligjit nr.9267, datë 29.07.2004 “Për veprimtaritë e sigurimit, të risigurimit dhe ndërmjetësimit në sigurime dhe

risigurime”, i ndryshuar, si dhe autorizimin e lëshuar nga Autoriteti i Mbikëqyrjes Financiare të Republikës së Shqipërisë.

Pala shitëse: Banka Islamike për Zhvillim është një institucion financiar ndërkombëtar, i regjistruar sipas legjislacionit të Mbretërisë së Arabisë Saudite, me objekt aktiviteti: pranimi i depozitave dhe shtimi i fondeve; marrja pjesë në kapitalin e projekteve prodhuese dhe sipërmarrjeve në vendet anëtare; dhënie hua ndaj sektorëve privatë dhe publikë për financimin e projekteve të tyre; investime në projekte të infrastrukturës ekonomike dhe sociale në vendet anëtare nëpërmjet pjesëmarrjes ose me marrëveshje të tjera financiare etj.

Target: Banka e Bashkuar e Shqipërisë është një shoqëri aksionare, e themeluar sipas legjislacionit shqiptar, me objekt aktiviteti: veprimtari financiare dhe bankare.

Ndërmjet shoqërisë Banka Islamike për Zhvillim (shitësi) dhe shoqërisë Eurosig SHA (blerësi), është lidhur “Kontratë për shitblerjen e aksione”, ku palët kanë vendosur të respektojnë kushtet dhe afatet e detyrimeve përkatëse për të shitur dhe blerë 30% të aksioneve të Bankës së Bashkuar së Shqipërisë.

Në përfundim të transaksionit, Banka Islamike për Zhvillim do të zotërojë 42.204%, shoqëria Eurosig SHA, do të zotërojë 51.017% dhe pjesa tjetër do të zotërohet nga individë.

Transaksioni i propozuar konsiston në përfitim të kontrollit të Bankës së Bashkuar të Shqipërisë nga shoqëria Eurosig SHA. Ky transaksion ka marrë miratimin paraprak nga Banka e Shqipërisë¹.

Referuar dokumentacionit të depozituar, transaksioni plotëson kriteret e përcaktuara në nenin 10 dhe 12, të ligjit nr. 9121, datë 28.07.2003 “Për mbrojtjen e konkurrencës”, i ndryshuar dhe si i tillë kërkohet autorizimi nga Komisioni i Konkurrencës.

Vlerësimi i konkurrencës

Në zbatim të nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, i ndryshuar, si edhe Udhëzimit nr.76, datë 07.04.2008 “Për përcaktimin e tregut përkatës”, treg përkatës i produktit do të konsiderohet tregu i shërbimeve bankare dhe treg përkatës gjeografik do të konsiderohet territori i Republikës së Shqipërisë.

Aktualisht në sektorin bankar në Shqipëri operojnë 12 banka të nivelit të dytë me kapital të huaj dhe shqiptar. Tregu bankar në Shqipëri ka karakteristikat e një tregu mesatarisht të përqendruar, pa praninë e bankave me pozitë dominuese.

Para përqendrimit, pjesët e tregut të Bankës së Bashkuar të Shqipërisë sipas aseteve, depozitave dhe kredive janë në vlerat 0.6-1%. Duke qenë se Eurosig SHA nuk operon në tregun e shërbimeve bankare dhe nuk gjeneron të ardhura në këtë treg, transaksionit i synuar nuk do të sjellë ndryshim të strukturës së tregut. Pjesa e tregut të Bankës së Bashkuar të Shqipërisë do të mbetet në nivelin 0.6-1%.

¹ Vendim i Këshillit Mbikëqyrës të Bankës së Shqipërisë nr. 28, datë 2.6.2021, “Për dhënien e miratimit paraprak për zotërimin nga shoqëria “Eurosig” sh.a. të 21.02 për qind të kapitalit aksionar të Bankës së Bashkuar të Shqipërisë sh.a.”

Si rrjedhojë, transaksioni i propozuar nuk do të çojë në parandalimin, kufizimin apo shtrembërimin e konkurrencës në Shqipëri. Përqendrimi nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë asnjë ndryshim strukturën e tregut të shërbimeve bankare.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”, i ndryshuar,

VENDOSI:

1. Të autorizojë përqendrimin e realizuar nëpërmjet përfutimit të kontrollit të Bankës së Bashkuar të Shqipërisë nga shoqëria Eurosig SHA.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.
3. Monitorimin e sjelljes së shoqërisë Banka e Bashkuar e Shqipërisë SHA, për një periudhë 1 vjeçare nga data e marrjes së këtij vendimi.

Ky vendim hyn në fuqi menjëherë.

KOMISIONI I KONKURRENCËS